



Uzroci radosti srca i smiraja duše (Meka)

Hatib: dr. Usama ibn Abdullah Hajjat

13. muharrem 1446. po Hidžri / 19. juli 2024.

Hvala Allahu, Darežljivom, Darovatelju. Zahvaljujem Mu što nas približava Sebi i dovodi do stepena sretnih. Svjedočim da nema boga osim Allaha, Jedinog, Koji nema druga, i Koji Svoju milost ukazuje kome hoće, i svjedočim da je naš prvak i vjerovjesnik Muhammed, sallallahu alejhi ve sellem, Allahov rob i poslanik, pečat vjerovjesnika i uzor bogobojažnih. Allahu moj, smiluj se, blagoslovi i spasi Svoga roba i poslanika Muhammeda, njegovu porodicu, ashabe i tabiine, i one koji ih slijede u bogobojažnosti, do Dana proživljenja, okupljanja i suđenja.

Bojte se Allaha, o ljudi! Spasio se i sretan je onaj ko se bude Njega bojao, i ko se pripremi za ahiret dok je na dunjaluku. "O vjernici, Allaha se bojte i nastojte da Mu se umilite i na Putu Njegovu se borite da biste postigli što želite." (El-Maida, 35)

O muslimani, zadovoljstvo srca, radost duše, lijep i spokojan život cilj su kojem teže svi ljudi i tome se nada svaki mudar čovjek. Svi ljudi koriste sva sredstva i poduzimaju sve potrebne korake da postignu ovaj cilj. Onaj čije je srce Allah prosvijetlio, nadahnuo ga razboritošću, zna da je vrhunac čovjekove sreće, potpunog zadovoljstva, radosti i ugodnog života u spoznaji Allaha Uzvišenog, Njegovom obožavanju, žudnji za susretom s Njim.

Šejhul-islam Ibn Tejmijja, Allah mu se smilovao, rekao je: "Vjerovanje u Allaha i u Njegovog Poslanika sallallahu alejhi ve sellem, uzrok je i temelj sveukupne sreće."

Ajeti mudre Knjige podsjećaju nas na to da privrženost Božijoj vjeri, pokornost Njemu, ustrajnost na Njegovom putu, traženje Njegovog zadovoljstva i napuštanje neposlušnosti Njemu, garantuju uživanje u lijepom životu na ovom svijetu, zadovoljnih srca i smirenih duša, kao što kaže Uzvišeni: "Onome ko čini dobro, bio





muškarac ili žena, a vjernik je, Mi ćemo dati da proživi lijep život i doista ćemo ih nagraditi boljom nagradom nego što su zaslužili." (En-Nahl, 97)

O vjernici! Dobročinstvo prema stvorenjima, na različite načine, opskrbljujući ih svime što im može biti od koristi, od novca i ugleda, podučavajući ih korisnom znanju, pozivajući ih da čine dobro i odvraćajući ih od zla, održavanje rodbinskih veza, milosrđe i druge stvari, sve to ima čudesan učinak u pročišćavanju grudi i radosti duše.

Poštovani vjernici! Jedna od najvažnijih stvari pomoću kojih čovjek može ostvariti sreću i uspjeh, na ovom i budućem svijetu, jeste suzdržavanje od pokuđenih osobina i lošeg morala, čistoća nutrine od zlobe, mržnje i zavisti. Allah, džellešahu, propisao je Svojim robovima principe i načela koji će ih odvratiti od neprijateljstva i zlobe, i širiti među njima sreću, ljubav i spokoj, a neki od njih su:

– Zabrana zavisti i prekidanja veza, o kojoj govori hadis, koji su zabilježili Buhari i Muslim od Enesa ibn Malika, radijallahu anhu, u kojem stoji da je Allahov Poslanik, sallallahu alejhi ve sellem, rekao: "Nemojte se međusobno mrziti, zavidjeti jedni drugima i okretati leđa jedni drugima (prekidati veze), i budite, Allahovi robovi, braća. Muslimanu nije dozvoljeno da izbjegava svoga brata više od tri dana."

– Zabrana ogovaranja, čiju je suštinu Poslanik, sallallahu alejhi ve sellem, pojasnio riječima: "Da spominješ svoga brata u odsutnosti po onome što on ne voli." Neko je upitao: "A šta ako je pri mome bratu ono što govorim o njemu?", a Poslanik, sallallahu alejhi ve sellem, odgovorio mu je: "Ako je pri njemu to što si rekao, time si ga ogovorio, a ako nije pri njemu, onda si ga potvorio." (Muslim)

– Jedna od stvari koje su preventivno zabranjene, jer mogu "pomutiti" čistoću nutrine i promijeniti srca, jeste nemimet – prenošenje tuđih riječi u funkciji zavađanja. Poslanik, sallallahu alejhi ve sellem, rekao je: "U Džennet neće ući nemmam" (Buhari), a nemmam je onaj koji prenosi tuđe riječi s ciljem unošenja razdora i narušavanja međuljudskih odnosa. Poslanik, sallallahu alejhi ve sellem, zabranio je da se o njegovim ashabima govori bilo šta negativno, pa je rekao: "Neka mi niko od vas





ne prenosi ništa o mojim ashabima. Želim da izađem među vas čistih prsa." (Ebu Davud, s vjerodostojnim lancem prenosilaca)

Bojte se Allaha, nastojte sačuvati čistoću svojih nutrina od zlobe koja ih može pokvariti i mržnje koja može zagorčati i pomutiti život.

Poštovani vjernici, postizanje sreće na ovom svijetu potiče čovjeka da očisti svoju dušu od zlobe i zavisti, i potiče ga da odvoji svoja postignuća i padove od svojih osjećaja prema drugim ljudima. Neuspjeh u onome u čemu su drugi uspjeli ne smije biti razlogom priželjkivanja neuspjeha i gubitka svim ljudima. Čovjek se treba izdići iznad toga da stvari posmatra iz lične, sebične, perspektive, naprotiv, njegova mjera treba da bude opće dobro i interes, ma koliko on lično ostao uskraćen, zato što zna da je zavist neizlječiva bolest i neprijatelj koji se nikada ne spaja s vjerom u srcu vjernika. U tom smislu Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "U čovjekovom srcu ne mogu se spojiti iman i zavist." (Nesai)

Zavist je jedna od najružnijih i najgorih osobina, a dovoljno joj je "ružnoće" da oni koji se njome odlikuju mrze svakoga ko im čini dobro, ako ga vide u stanju boljem i vrednijem od njihovog. Zavidnici su u stalnoj tuzi i stalnoj tjeskobi, ne osjećaju sreću u životu, nemaju lagodan život ni dobro stanje.

Bojte se Allaha i zapamtite da nema puta do sreće duše i blaženstva srca osim obraćanjem i predanjem Allahu, jer s Allahom nema tuge – onaj ko ima Allaha na svojoj strani, nema potrebe za tugom. Sva tuga pripada onome koji se okrene od Allaha, a prepusti se sebi i svojim prohtjevima.

Donosite salavate i selame na pečata Allahovih poslanika, Muhammeda, sina Abdullahovog, to vam je naređeno u Allahovoj Knjizi, u kojoj Uzvišeni kaže: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

